

Fungsi simpanan dalam inflasi

KUALA LUMPUR, Ahad.— Datuk Seri Dr. Mahathir Mohamad menegaskan simpanan perseorangan memainkan peranan yang amat penting dalam pembangunan, lebih-lebih lagi dalam konteks pembangunan negara-negara dunia ketiga.

Perdana Menteri berkata, oleh itu pendekatan berkesan dalam penggalakan dan penggunaan simpanan perseorangan bukan saja dapat membantu mengurangkan kesan-kesan buruk inflasi tetapi juga meluaskan sumber-sumber tabung tempatan bagi pembiayaan program dan projek-projek pembangunan.

Selain itu ia juga dapat membantu dalam usaha meningkatkan mutu kehidupan masyarakat.

Dalam perutusannya di buku cenderamata sempena simposium antarabangsa kedua mengenai penggemblengan simpanan perseorangan di negara-negara membangun yang bermula di sini esok.

Datuk Seri Dr. Mahathir berkata, pendekatan dan kaedah yang berkesan dalam penggemblengan simpanan perseorangan mestilah mengambilkira suasana sosio-budaya dan ekonomi masyarakat.

Pengurusan

Beliau berpendapat, hanya apabila institusi simpanan dikendalikan selaras dengan sistem nilai sesuatu masyarakat dan persekitarannya barulah ia benar-benar dapat diterima oleh masyarakat.

Simposium seminggu itu dianjurkan bersama oleh Bangsa-Bangsa Bersatu dengan kerjasama Institut Bank-Bank Simpanan Antarabangsa, Persatuan Bank-Bank Simpanan Sweden, pihak berkuasa pembangunan antarabangsa Sweden dan Bank Simpanan Nasional, Malaysia.— Bernama.

Bahan asal dari Arkib
Negara Malaysia